

# Dus suppleants rumantschs en il cussegl grond

## Tge impressiuns han novizs dal parlament chantunal?

DA CLAUDIA CADRUVI /ANR

■ **Gian Derungs e Beat Deplazes han substituà quest'emna dus deputads. Ils dus suppleants raquintan da lur impressiuns dal cussegl grond e da la via politica che ha manà els en il parlament.** «Igl è interessant da s'entupar cun glied d'autras partidas. Quai ma plaschai, di *Beat Deplazes* (ps/Cuira) ch'è gia la segunda giada en il cussegl grond. I saja impurtant ch'ins prendia part sco suppleant era a las sedidas da fracziun, uschiglio n'hajan ins betg idea, da quai che vegnia tractà.

### Stà president da Camuns

Las debattas sajan interessantas, di il suppleant da Cuira. Ma i dat era chausas che plaschan damain. «Tge che ma vilenta è che la glied n'è betg punctuala. Sulet l'emprim di avain nus entschet

ad uras. Uschiglio mai, di Deplazes. Ils blers deputas legian era pli gugent gassetas che da tadlar ils arguments. «Parlament vegn da 'parlare', perquai duess ins sa stentar da tadlar tiers als collegas.<sup>1</sup>

Deplazes ha 51 onns ed è creschì si a Rabius. El ha emprendì da miradur e suenter anc fatg in emprendissadi mercantil. Oz lavura el tar la Swisscom. Avant 19 onns saja el i ad abitar a Camuns ed ins haja immediat dumandà el per il post da president communal. «Il presidi è stà ina buna scola. Jau hai emprendì immens bler.» Suenter la fusìun da Camuns cun auters vitgs da la nova vischnanca da Suraua è Deplazes restà anc intgins onns en la suprastanza communal. Ina giada ha el candidà sco deputà al cumin da la Lumnezia ed ha fatg bunamain tschient vuschs – in bun resultat per in socialdemocrat.

Dapi prest trais onns abitescha Deplazes en la chapitala ed ha candidà l'onn passà sco suppleant. El ha fatg il segundmeglier resultat dals set suppleants da Cuira. L'onn proxim ha el en senn da candidar per il parlament da la citad.

### Giuvn impressari da Lumbrein

*Gian Derungs* (pcd/Lumnezia) ha 26 onns ed è creschì si a Lumbrein. Suenter la matura a Mustér ha el lavurà dus onns tar l'UBS a Turitg e lura studegià economia a Winterthur e management d'immobiglias a Zug. Ils ultims onns ha il giuvn Lumnezian bajegià si sez ina firma d'immobiglias a Lumbrein.

Sia via politica ha cumenzà cura che l'Uniun da mastergnants ha mess si el il 2007 per il parlament regiunal da la Surselva. «Da quel temp hai jau decidì d'entrar en la pcdi, di Derungs.

Quest'emna è il suppleant stà l'em-

prima giada en il cussegl grond. En il parlament regiunal haja el gia emprendì, co ch'i funcziuneschia, di Derungs. Ma en la Surselva politiseschia quasi mo la pcd. En il cussegl grond existian dapli opiniuns, dapli concorrenza e las fracziuns hajan ina gronda paisa.

Da tadlar discussiuns davart tematicas impurtantas saja interessant, ma era da pudair prender decisiuns che hajan influenza sin il mintgadi u sin l'avegnir dal chantun, di Derungs. Tge che plaschia damain saja la politica da partidas. Tschertas propostas na vegnian da principi betg acceptadas, perquai ch'in'otra partida saja vegnida cun l'idea. In outra constataziun critica dal suppleant lumnezian: «Cun bleras propostas vegnan ins mo per pudair dir ch'ins haja fatg insatge. Sche la proposta va atras u betg, n'interessescha lura betg pli.»



Gian Derungs, (26) (san.) da Lumbrein e Beat Deplazes (51) da Cuira, oriund da Rabius. FOTO C. CADRUVI